

徐
文
長
逸
稿

徐文長逸稿卷之二十

山陰

張汝霖肅之父

評選

張維城宗子父較輯

王思任季重父

碑

山陰劉侯去思碑

今夫以百里之長而聽斷百里之民長之心一耳非
有二也耳與口目一耳亦非有二也而百里之民蓋
千萬其心亦千萬其耳目與口夫非千萬其心與耳
目與口如此其衆矣且鬼以匿而狐以奸者百出而

乘其所不及至欲以一心一耳目一口以臨之一不
當則強弱倒置淳黠無所別書史起而陰把其衡平
者十一而不平者十九謫讞興而怨聲作矣噫然則
孰爲聽斷非難哉劉侯名某者之長我山陰也其才
能真足以起敝而補完破裂特以承某侯後侯恬然
安之此句作骨不欲獵取赫赫事更張獨其聽斷則真若止水
須眉靡所不燭若禹之鑄鼎卽有魑魅魍魎亦夔夔
睢睢畢露而不可逃其折而氏昂之又若權石然無
不愜其輕重而後已自一事至百千事自一日至三

年民感而入者無不踊而出於是一邑百里之中帖帖若無事吏胥與臺之輩亦縮手重足而退聽無有攫民一粟一錢者在漢史劉陶以孝廉宰順陽無他事特以縣多奸猾陶能摘而發之既去吏民思之爲作歌曰悵然不平思我劉君何時復來安我下民今侯之以召入也民思而歌之亦如之未已也謀共文而碑之而屬書於某噫固其宜也異時邑校圯侯新之不令勞且費于民江汰天樂侯隄之可十萬丈廣狹長短視田業而責之主者民亦不知有勞凡此

皆教與養之大者也。然學不圯隄，不壞則侯亦不作。吾所謂不獵取赫赫而必欲功自己出云者，大抵然也。噫，有才而不急於名，此更難。

王先生去思碑

代

先生名一化，字汝誠，揚之秦興人。自幼以經行聞。隆慶丁卯，應歲貢科，授嘉禾訓導。四年，擢新昌教諭。會宮齋壞不治，無以居諸生，遂出俸新之。業既有專所，乃與諸生約曰：「某日當詣會課，某日當會課於邑中。第上下有疑，必親解，有不足必周。」於是諸生益思奮。

起德藝倍往昔邑偶缺長吏監司以家屬先生辭不
可則取綬佩之至邑堂召父老爲宣解聖諭使訟
者內革不先以楚迨還家民不忍其去滿幾年監司
若院使者致獎者再三會應天缺教授銓以先生名
請於上可之先生遂舍新昌赴應天士與民多先生
教且嘗攝邑有令政懷之相與礱石於宮將紀其盛
率父老一二輩走留都屬余以書予惟先生揚人也
宦其鄉者有董公仲舒以經義名漢書其鄉之先輩
則有胡公瑗此則兼經與治而有之先生生長其鄉

意不使二公者獨美於前故試而輒效也如此其令人碑之也宜矣然予少時抱經在庠中嘗聞新昌二許先生之賢既去而人亦碑之今距此更四十年來教新邑者不知其幾乃始一再見其然噫亦難矣然余抑聞之鄉校之易毀也自春秋至於漢之東京往往特書其事其毀也至不避公卿大官矧爲之師者朝夕其間者也耶假令有一疵卽人自爲厚也免於訾亦幸矣安能令其碑於去後也如是然則先生之得此也豈不誠難矣哉爲作詩曰

昔予抱經游於鄉校、二許先生實撫厥教、迨其性矣、士有遺思、礱石以書、螭首巍巍、今四十年、師則繼踵、生長秦鄉、佩胡服、董京兆之泮、比隆辟雍、舉以授師、其寄彌崇、余書則瑣、碣師徒勤、儒林列傳付之史臣、

沈氏祭田碑銘

代

某五世祖祥二府君、曾祖裕齋府君、葬會稽東二十里阮家灣、故有田以供祭、漸乾沒、初改逐、支遞辦、後乃漸久漸疎、追遠念忘、又或力短心長、過時滯舉、某實痛之、某茲特割私田若干畝、特取歲入、用給兩府

君歲祭其於例應遞辦者自不相妨而於所謂力短
滯舉者亦可少寬其責備噫某此舉亦聊爲餽羊耳
昌大其事不無望於後人詩曰海之於河首尾則親
河之首源迺自崑崙計里三萬計時百旬於海之委
寧不遠耶然而祭海必先曰河人孰無祖祖孰無祭
或數或疎以物豐匱因匱而疎責備則難莫敖之餒
吾恐坐觀留畬若干畝以備歲奠淩盛牲醪毋缺盥
薦如醢有瓜後嗣其昌我倡微捐聊爲餽羊

沈氏冢其外親及祭田碑銘

代

某外祖姓陶名某字某會稽陶家埭人娶外祖母董氏生女三長適先君東平公某外祖歿時外祖母年纔二十五孀四十五年歿時年七十矣而妾王氏者孀時年十八孀至今五十二年陶竟不後以故當二孀之生也某母夫人迎之並養於家及董孀之歿也爲買山曰戴於殮舍卜吉以葬而王孀生壙附焉歲時墓祭無怠無廢某意孟莊之孝不改父政然禮以物興物匱禮廢鮮不由之某茲用錢若干買田若干畝給戴於塚世世牲醪上以迎體母心下以成就不

改物具禮廢咎將誰歸詩曰

我母之母於維董姬雖曰外家實祖母屬

注音

借我陶

翁翁卒無嗣我母迎姬以養以事卒則葬之以冢以

祀姬媵曰王陪姬來我預壙附姬以待安爰生養歿

歸乃同一所買田若干畝給牢禮費子孫守之世世

勿替匪直大家

音姑

弗餒於兆實繼大母迎歸之好

徐文長逸稿卷之二十一

張汝霖肅之父

山陰

評選

張維城宗子父較輯

王思任季重父

書問

答吳宣鎮

兒以所惠權什一於京師自不得便去而居食二事
迫之使來復就蔭於樞柙之一葉便當進謝舊恩僕
以形跡止之諒不以爲簡也壽作未免過諸公之暇
謂須爲吾儒立赤幟入道語以張之故聊復效顰然

不敢自以爲是故欲進而復止惟高明裁酌

答許口北兵憲

清宴超談數日來齒頰間尚有餘味茲更以妙句恭
一讀之耳畔復聆鈞天矣翁其少俟高齋烏几當有
撲撲然小缶之響也

答王新建

瑞樓

旅次朔漠遂復追冬無一毫之益於主人徒費其館
穀而已承獎不特生非其人抑且未有此舉也刻尊
翁老先生集語未了而輒許當是此公夙心生亦何

所預也。茲者處於外禪，稍得燕遊。每陟高眺，遠懷不勝情。南望關榆，益倍知己之想。行者倚轡，艸艸布宇。應先生暨兩公，嗣不及專書芙蓉芳蘭歌舞益妙矣。安得如曩者，再領於筵末耶。

與陳成晚

曩所沐非言可盡。書至推獎，又非鄙劣所可當。明春當入關，與左右翔翔園榭之間，更挹懿美也。小艸奉記室求教不具。

與王口北兵憲

徐文長通雅卷八
東施之眉愈顰愈嫵過不鄙遺輒復避命履寒涉遠兼布奉候之忱

答許口北

一言之加溫於挾纊纊復美矣溫當何如第念諸所遺乃左右交於王公者以寵山人如逾分何捧檢拜嘉煖氣滿屋以遵曩約却不遂候也

又

千羊之皮不如一狐之腋玆此貂鼯豈比常鼯矧奉雅意俱連城矣

與宣府

序艸書上求教然後發希勿吝指瑕也三公來索意
欲書三紙分投之手輟而筆凍敢以勤記室何如明
日專望敝裘破絮隻箱不能悉貯再乞其一

答何先生

名九州號春亭宿遷人

先生以子文而謬獎鄙劣鄙劣亦因子文而得知先
生是日飯我於齋悉出篇札讀之旣復描寫風致坐
中俗客亦翩翩欲飛老朽庶幾後塵能不馳越卽山
川縛我吾豈橘柚也哉知握手有日也小詩畫竹略

見區區病起懶書未悉傾慕

與某公

念別者久追惟雅情益增忡忡季子微兄每一寄書必及麾下高誼僕始知公今爲遊戎千里之才殆應少展矣而子微者抱才久困又復拙於時樣計今所處當亦蹇落不偶而其郎君名大觀者誠袖奪魁之手竝亦悠悠僕獨奇之聞公亦稍剪拂儻帷幕館穀間有可接引願始終之也僕舊日聞公說遼陽事從酒觴禪寺邊拔刀弄馬呼嘯劃然六月盛炎令人肌

粟只今臨書乃復想見其然不由人不起舞墮幘也
外小抹二幅寄將遮壁坐寒耳無他物可致情也

答茅君

湖人

辱書初論三物知足下固高視一世所謂具隻眼者
良造執策以臨舍黃澤之蹄宜俱却步重孤高舉聊
擬爲公作一馬首輒赧然有所進天寒不堪旋書敢
以舊途鄙作十二首計四紙塞命鏡一頰得兩醒自
爾不能免也語在筆尖顧復閣縮亦坐寒耳非敢簡
也

答李獨石

公威名赫然。僕亦思一仰挹。願茲行以山水撩人而
然冠蓋尊嚴。似非苴竹可接。俟他日轉鎮。敝省或當
納履曳裾於油幢間也。道里脩阻。致饌腆多。不勝感
荷。

又

僕每從書冊中。慨慕古之名將。而不可見。往往兀坐
歎息者移時。況近在六十里間。兼以敦說詩書禮樂。
爲儒黨中白眉者哉。再招而不敢遣者。是必有說存。

於其間也。可以默會。仰乞亮原。僕之掃門。豈無日耶。
簡許口北

慚享我公分庖之惠。令人每飯不下咽。顧無可仰答者。聊作墨君一枝。以見眇微。欲陳情素。益露酸寒。辟如錦綺滿席。羔馐盈俎。貴介王孫。奕奕彬彬。方以裘馬相雄。墻角忽出疎梅。不笑必厭矣。非公妙雅。寧易賞識耶。絕倒絕倒。

答王口北

以韋賤仰交王公。恐涉非分。是以寧甘疎外。野客清

寒僧廚齋寂，承此食肉之盛惠，得免疲羸。因思無竹
雅言，形諸圖畫。惟公超雅，諒不揶揄。停筆以思，捫心
知感。

答許口北

緬惟超曠，兼之藻黻，謂宜日不去左右。方是鄙心，第
以宵鶴塗鷺勢，不可以追逐。故復悠悠耳。昨愈出愈
奇，便當勉步以請也。

又

鄙章纔投和篇，輒至。霎爾取營，妙若宿構。辟如老將

快馬研陣突圍使人旗鼓不得息安得不豎旗以降耶

答張太史

當大雪晨惠羔羊半臂及菽酒

僕領賜至矣晨雪酒與裘對証藥也酒無破肚駐罄當歸甕羔羊半臂非褐夫所常服寒退擬曬以歸西與

亦施

腳子云風在戴老爺家過夏我家過冬一笑

答李長公

劉君來得長公書并銀五兩前此亦叨惠矣何勤篤乃爾耶令人不可當顧念老病漸逼灰稿須臾耳無

可爲報。如輪迴之說不誣。定庶幾了。李源圓澤一段。
公案。聞勳業日隆。大用在卽。卽披甲躍馬。三發小侯。
破的。而飲羽買韓盧五明馬。適至便牽往蓮花峯頂。
浮大白。不計斗石。侍兒抱琵琶。振振響萬谷中。儼然。
突騎出塞之爲者。此等豪筋俠氣。定勃勃長在掌股。
間。正今日囊錐時事也。如相憶。伯喈便可呼虎責坐。
飲耳。臨書三歎。

與章君

昨偶有占奉復失詳。辱餉屢矣。卻領則違尊雅。領之。

又似范曄載市尚食果皮飲酒畢命猶饗也兩箋竝
施之菊雖不成染但就鄙蒙作此以來此爲第一古
人作有葉之物簡則不足遮瞞人耳故曰人皆以清
陳爲巧我則以繁密爲然就中量有餘不能堆積并
用焦墨也此不可與俗眼評譬語生物茂密者必有
餘者也一理耳畫美人便往一覽欲公賡此鄙詞盡
其中丰神無佯避且曰少俟也成則幸兼軸以來之
常箋輒讀薄篇一淨之

與呂君

夏間幸得一艷手神自此屢興金幕山川間之莫遂
瞻仰如何如何繼惠鮮腊百頭茲復以薰橘百餅兼
之佳詩到時值雪下輒呼童煮茗急發封緘竝一咀
嚼鬬芳角潤令人悵然復興安道之懷儻便鼓楫想
當握手數朝豈至望門而返耶吾丈以爲何如

簡友人

半身不遂屢見於書中而無一人覽及遂使不遂二
字獨傳豈文字顯晦亦有命耶呵呵

東王將軍

聞公提兵西渡，便可圖會。甚慰甚慰。舍親值蓬萊驛，
支應願公且安行。至十一日辰未到，彼此私情也。雖
然，百里趨利，兵家所忌。師行日三十里，古法也。如何。
答叔學張君

久疎教言，殊切耿耿。昨辱枉過，又無緣得相把袂。若
以爲憾，僕同之也。先後嗣惠甘鮮，感謝感謝。稍晴當
圖會于子先店中，却須先期一訂。行將掛百錢於杖
頭，與君冒高桶。襲短後，渾高陽之徒，取醉於市樓。談
旅客之舊跡，振衣上之京塵。月黑漏沉，長歌而後別。

也。如何如何。新春伏惟尊履佳勝不宣。

答錢刑部公書

昨尊使回後、再閱詞翰、及今日復示二作、頗悉意旨、敢遂奉答、往寓杭時、則聞門下作法事於西陵、僕忘其鄙陋、欲形諸篇什、以不知其何法事、故多相問訊、始得之、非有疑於門下也、門下是出世人、作出世事、僕雖不得其門、曩時亦嘗留意於此宗、作一看經僧、過來雖不認得真、月莫亦認得人、手指月處、僕自疑、則有之、豈敢疑門下耶、僕之自疑、亦非疑佛法也、一

悟直超於門下則瞠乎其若後至謂信心豈便讓門
下耶下根之人縛以習氣不能勇猛精進自所慚也
謂疑佛謗經十年前事耳今自信其決無也恃愛一
明此心逃禪集如刺成雖不敢附不朽然僕非畏犯
世諱人也望且賜教

奉尚書李公書

石麓

此書具見文長與文定

離合之故

某不佞自惟以一介之賤士無片長之挾走數千里
之道以仰托明公之門牆而無所疑懼者非特以其

道德之高深、問學之純粹、行誼之正大、操履之介廉、
謂足以師表而涵育之、始焉因之、而終期於宗之、而
已也、亦以明公雅量所及、每矜人之所不能、而其使
人也、動合器之之道、名實流播、非特出於楊友一人、
某在遠方、蓋習聞而素慕之、是以一蒙尊命、而敢以
身往也、奉侍以來、自揣所具之器、既不足以光明公
之使、而其所不能者、明公亦既矜而恕之矣、既又慮
其進退之無所據、而見疑於時也、乃令習而延之、是
明公之所以待不肖某者、誠無所不用其厚矣、某敢

不勉而承之姑以自試其果能與否而敢遽自外於
明公之德意哉但其中有不可者五不敢不預白於
明公而其最可疑者則入粟之說也入粟之事在賢
者亦多就之以卒售其兩可之志但在某之身非時
力有所決不能抑亦心有所甚不欲其自知之真而
自守之篤有不可遽爲明公言者當時徒以查氏見
促用此言以緩其期而他人往往來訊北上之由某
漫假此以支吾之耳不知何以得聞於明公之前也
且某當臨行告有程假暮春不復例得扣停設某雜

有他念其於處此豈得如此專決明公試於此處察之亦可以信其決無矣則一至暮春便須辭去而某近在道途屢遭詰問猶假入粟之說以答鄉人明公不知將謂其蓄志如此反覆某將何以自明此其不可者一也至於習效斯事恐難猝成即使得成恐不堪用今某旣已願學自不敢不竭其心力而才有所困事涉避難如聞當時亦有緣此以得罪他所者明公縱不見疑某將何以自解此其不可者二也諸掇繁多不能槩及稍有餘力尚欲尋繹舊聞正使竭其

力之所及、不過表文一兩篇、大對一兩對而已、明公
縱不求備、某將何以自安、此其不可者三也、收散文
目、類有掌管、呼約、輪轉入侍、則又寢處內城、臨日揮
毫、甚至聚食一所、某欲求免三者、而衆人皆爾、明公
縱欲優容、某將何以免自異之嫌、此其不可者四也、
旬日以來、袖手坐食、退頌芻米、實增汗顏、假令自今
以往、許其嘗試、漫爲其實、未見成效、若於芻米之外、
復同衆人、月給積至一季、爲費愈多、明公總不校量、
某將何以贖虛糜之罪、此其不可者五也、夫聞命而

卽受隨所欲而不敢辭者賤之所以事貴卑之所以承尊也因其人而廣其資之所近諒其短而不苦其性之所難者知之所以容愚賢之所以成不肖也畜於志必宣於言慮於終必白於始者上下之所以其成夫信義也某既不敢不以賤之事貴卑之承尊者自勉而亦不能不以智之容愚賢之成不肖者仰望於明公故敢并以其畜於志慮於終者而宣於言白於其始焉惟明公共宥而裁之

與朱翰林

目者於某人書見公及某之言似以某有意自外於門牆而高自矜匿不令人望其顏色某不惟不能辨且不敢然有一言焉以獻又似以慙公而實非也某往歲客南都初亦不敢先謁一巨翁巨翁雖不言似不能忘者其後巨翁者惟病某往謁之勤而避之不能矣是以願公且姑待行見翁之避某而厭見某之顏色也入上谷得樵歌十首敬以塵聲音之陋如此顏色從可知矣

與李子遂

兄丈此來其於某如持準繩向曲木雖未加彈界然
於矯枉之功固爲不少閩越相去千餘里求如兄輩
復有幾人恨卽乖隔不終夾持耳某比亦不健又稍
治先人之塋迨於罷鍾計亦涼冷台宕之遊恐亦不
成何時復動帆策相與捫眺於綠蘿白月間耶子牙
兄便布此一候動靜欲書新什求正會荷荇者所誼
頽然閣筆宿抹一幅汚清齋又煩一事近有友人假
與一園稍近水竹某將就栖其間舊有白鵬籠久虛
幸兄買一隻托子牙兄中得一黑者更妙

與朱太僕

臘尾春頭、俱坐薄寒、頽然牀褥間、遂失面承、請教甚
歉也。委艸亦坐是而稽比始辨、敬呈請削、知不足采
也。別有願使君轉託、生不敢逆料、公果拒與否、輒以
其紙二幅、并與生之簡呈請、儻奉進止、便當領傳、嗜
好者不量、往往徒見敝寓壁間粘掛之妙、以爲公真
不棄鄙人於翰墨間、故惹却此累、惟察而恕之、

答俞都戎

曩客貴節、惠誼深篤、有踰骨肉、感而無報、寤寐耿耿、

與日俱長、此肺腑中語、非虛諛也、邇又遠寄僧書、扇
輓、僧書乃難得之物、重疊而至、令人何以堪之、峨眉
之雪、至六月尚積住、而八月又繼之、不知何時消化
得盡、此大似吾之來也、宦聞日騰、深爲故人喜、儻途
北更一握手、何幸如之、

答李長公

僕比於曩昔、倍衰老、陳人耳、而公又自處高華、有鵬
鶚趁風、蛟龍得雨之勢、顧所以處僕者、昨俯僕而今
循墻、雖魏文式廬、信陵虛左、殆不過是、至於略似、

錡不待畢展則又居然李廣上谷之超凌魏尚雲中之節制僕雖少知寧不爲故人一喜躍耶馮較三百里間無一刻忘左右也

答朱少監

紙裏朱提重不勝舉不特自顧菲劣不宜堪比而公卽貂貴乃是清流得此於公更百珍重辭日製荷是使野人快受也

報朱太僕

昨公起東帶迎客座中途有擁衆篡取之變江湖萬

里何怪赤眉之紛紛也。公儻幸再圖，庶免彼此稱戈。斯爲上策。不然，卽區區弱水不競，呪咀精虔，彼且涉水停津，不免爲蛟龍所得矣。

與薛鴻臚

以蒙書卷，易昨纂繪，韓愈之賢，觀記畫而尤信秦政。雖虐亦留壁而復還。

又

相如詞堅，秦壁始出，竊比玉斗謝罪之遺，幸勿碎之。

與陸韜仲

一面顏範舊感滿膈愧無下榻以傾積懷舊有答餉
詩久失寄緣衰耄過事可辨者往往失忘茲書上以
發一笑大蘇以拾石供參寥竝是撮土爲香意也舊
刺三本送將遮眼糊牕亦得總是香土公案

答潘中六

古人食鼈不得染指而出知珍味之難逢也佳品屢
承何幸如之

與陳

朱某至知足下佳好爲慰僕行時辱多物又煩呵獲
芝馨之類倍常戴德懷報徒深耳僕歸計未定旋食
爲艱想曲池寸魚長一二尺必能扶杖閱網于其間
勑饌烹鮮醉到談辛苦也

徐文長逸稿卷之二十一

徐文長逸稿卷之二十二

張汝霖肅之父

山陰

評選

張維城宗子父較輯

王思任季重父

行狀

慈谿縣學訓導祝公行狀

代

先生姓祝諱某其先家徽之歙也宋寶曆中曰某者以翰林學士來知紹興因家焉遂爲山陰人某子曰某孫曰某相繼以賢科顯入明徙光相里自初家所其後有曰某者爲先生三世祖贅蕙蘭里倪氏女

因復徙家蕙蘭里焉。某生某某生某娶於王生先生。先生生而貌昂偉性樸篤言動激射而內實含慧能讀書攻文鄉小試輒最嘉靖己酉遂用儒士科第一領省試牒壬子復用諸生第二上省試再不錄歸而食廩於學至萬曆丙子遂以久次貢入例授訓矣又以失候銓晨衙放歸又五年而再入得訓慈谿在慈五年數却生貧者贊舉某先生祀賢祠獨力其子某報金頗腆子三進之先生三却之曩先生以毛詩起鄉中鄉弟子從之者如市而某亦抱笈承下風列鄉

弟子後先生每旦起整冠齊履徐舉案坐已所築室
於玉虛道觀左之圃花盆魚澗講說毛詩朱傳諷咏
中和觀午鐘而始罷散去竝冲然自得都忘其困折
拂爵不知無聊之爲何物也及是訓慈慈經生幾千
輩固多業毛詩也其在師弟子間所自得當不異觀
中時以故督學劉公某按校諸師稍用近體以試至
先生大賞之爲殊禮是詩之用果不效耶噫龍蛇而
竟尺蠖之一時之快適何以贖終身之無聊耶竟以
是病不起矣爲己酉五月一日距生可六十四娶母

夫人陶子女某某繼劉子女某某先生之病慈某忝
牧丹徒不知也晨衙有白帽蒼頭入驚相問起函乃
得訃遽位而哭既徐省副牘叔子某托狀語也大約
得先生槩而顧不及祝日春事豈諱耶噫毋庸諱也
日春爲先生從父行初亦生也嘉靖中北走上書觸
忌諱特甚而春已遽亡走詔下捕春不得改詔

有司悉收責其家責益急家稚老鳥獸散都不知所
此舉余素疑之頗奇以結

狀亦奇

爲而先生獨挺奮自承願遠走數百千里外以陰索
然遽則無能爲也願少假日月果得春然春亦以饑

寒流轉久而戒錮益急踵爛以成乃卽其所列有司
再三驗核信得據以報事遂寢噫此先生一仁且義
事也且占其幹胡諱也

墓表

方山陰公墓表

此文十九遷圖

渭嘗聞越長老學士言自知山陰以來吏治有文學
者兩人其一歟方公也公治山陰時數值潦郡長吏
湯公始議爲水門者廿有八北接以隄長百丈廣十
丈欲以犍大海中潮所往來口制水出入石空山錢

枯冶土乎丘陵。菱茅篁竹童林。數十塞九決而猶不
已。役率倚縣議紛起。公營益力及感。至今三十年無
潦災。增田以萬計。天樂屬界遠阻山習傲。每訶挺所
遺呼吏士如蝟。微然公一夕遣卒悉縛數十人以來。
杖而諭遣之後。無不一呼輒集者。出見縊屍無列者。
疑之。停輿捕。飭舍惟一人匿。不出一訊具服。監司使
者牒雨集。無不從容對者。有不可持不為動。民不能
自白。必再三諍得之乃已。嘻。治固劇且難至此哉。傾
往往得閒暇日。與山人壑卿暨諸學士有才行者益

談道論文或稍及民疾苦而公所著爲詩文他不論
卽入署以來者亦且盈數卷悉出心入理誠切篤緻
如其爲人如作逐蝗文而蝗枕股以斃滿壩岸者可
知已先是嘉靖己丑間知山陰者爲鳳陽劉公才妙
敏有建安風渭年十一以事謁之輒課問渭知已能
爲舉業文字三年矣遂令題令立製一篇稍賞之謂
青紫可拾取顧勉令博古書渭自是好彈琴擊劒習
騎射逡巡里巷者十年而始遇公公又謬器別之從
吏令籍泮爲諸生也至今又二十五年墓木拱矣而

渭。係。然。猶。諸。士。也。氣。消。沮。蓋。并。少。時。所。謂。馳。射。彈。擊。
者。公。之。顧。獨。得。遇。公。嗣。子。阜。民。於。逆。旅。以。表。墓。屬。焉。
感。舊。傷。知。悲。澗。時。命。不。覺。其。涕。之。橫。流。也。已。乃。灑。然。
操。筆。爲。之。表。表。成。以。告。於。故。長。老。學。士。嘗。懷。思。公。者。
舉。無。不。涕。泣。然。下。公。諱。廷。璽。字。信。之。號。南。岑。起。賢。科。
仕。止。於。縣。而。鳳。陽。劉。公。者。名。昂。字。晉。初。號。望。岑。山。陰。
士。人。謂。自。知。山。陰。官。長。有。文。學。者。兩。人。劉。其。一。也。

墓誌銘

吳俠士墓誌銘

縣諸生吳君文明甫卒二十有五年而其子某始屬
銘其始雖以幼穉遲之然論亦未定也而今則定矣
君事其父母孝嘗內小嬪李李詆其母促出之及母
歿不輦者三年人服其孝其宗族也十斃七門閭無
隻履跡君日往視歛且療人服其仁其社師胡先生
純歿君約二子衣食其妻與孤終其身人服其義
君妻陋且病易久罷粧沐副方新也而愛不遷人服
其厚生如是矣乃歿二絕曰論未定者何也噫惟孝
友廉信人多雜以俠故曰論未定然俠豈足以掩四

者哉。故曰論定也。君喜士。士豪駁者。無不集其門。一
月有沈璘者。被危構。君直於郡。庭構者。詈辱君。君客
殺構者。會有司以他事仇君。移坐君。君在獄五年。晝
則讀書。夜則筆記。卒徒陰事。卒徒知之。怖。會大吏不
恤囚君。遂歿。卒徒手。君父鄉傑也。嘗會其宗。殺不肖
子孫者。以君寃。持數百金。擇委不靳施者。圖活君。然
卒乾沒。君遂不得活。君諱某。文明其字也。生正德某
年月日。卒嘉靖丙辰年月日。皆十一也。閱五年。葬峽
山丘家塢。其世居山陰利樂村。始祖唐文簡先生裔。

入明而有瞻瞻生皐皐生俊俊生濬濬生某某生實
生君君娶宋生女潔適會稽諸生某副以鄭生系綬
紳系子明際系能詩從予游屬銘銘曰

郭解以客坐范蠡速子歿蠡非不明客罪解抵古
語云殺人者歿乃有幸貫而千金之子顧終歿於
市語胡足信哉人亦有言儒以文亂禁俠以武犯
法班固酈炎非儒者耶俱歿桔拳陳亮以儒三置
於俎希不爲魚肉由斯以談儒者之與俠幸不幸
明矣而以成敗詆訛幾何而不爲愚人

葛安人墓志銘 敘安人有生色處

上虞之崧城有潘隱君某者其女配叅政葛公某封
安人里中稱其賢有年矣而不知隱君暨其縣布政
陳公某我會稽侍郎章公某並賢也而女之母則章
之甥陳之孫也世固以家法聞矣始叅政父大理公
某爲南御史抗疏忤闕瑾被 詔逮時叅政公僚然
以一鄉解生倉猝掖大理公走 闕下大理公淑人
俞方驚頓就奄使無安人則俞淑人且不起及事平
大理公幸知邵武俞淑人則留以奉大理公之兩尊

人安人旣以一身奉淑人則又兼奉兩尊人其後叅政公成進士得主事刑部而諸內尊人念叅政公不已不令安人獨留則安人又以一身走數千里奉叅政公於邸邸旣而轉知淮安徙按察副兵備天津再徙得叅政山西安人獨山西不偕耳其在邸則真爲主事把燭炤囚書數從吏使得多平反其在淮在天津則後先爲府公鎮公時時視候涼煖把鍼尺測寬窄短長徐取縑帛絺絨而袍襖單複之或客至則自篝香立鬲釜間手醬酢陳圓方亭齊以授一童子步

不踰闌檻而設以告具終公兩役竟不令衣工庖子
一識衙署扉此豈獨其才能通也謂隙當必窒耳至
其客所師友於公父子間者安人則又善爲陶氏媪
故事伺而得其良益相與戒父子間謹權輿無替禮
設若淮之倪工部澗天津之劉都臺燾丁吏侍士美
汪按副其陳戶部斗南諸公者後竝以文業顯或來
宦浙中無不造請拜安人於堂退而語諸人則又無
不多安人識以爲真能成其夫與子者先是叅政公
捐山西館其後長子婦又相繼亡莫侍獨今鄂州君

兄弟兩孤悒悒遶膝下而大理公翁媼益老不事事其後芽苗孫髻冠髻盈室安人獨以一發上之虔祖曾生歿之事中操兩孤之最鞠下叢諸孫之哺飭纖巨畢磨孝慈益舉及鄂州當榮戀侍則勉使就道至其九十永愴未亾壽者雲興成賀而亭樂則可稱陳情之奪未見曲全於劉姬追遠之厚庶幾默契於子與者矣鄂州予友也曩昔宣慕安人數徵篇什懿德之敷未嘗不入予筆札間且距僅百里而先公昨存其於葛門非旦夕交好故鄂州以狀涕而來而予慨

馬銘之以太息而往。特有拙蹇不彰耳。無謏也。始鄂州已後其伯父翁某。未幾翁嫗竝捐。鄂州自謂益可無出。安人強之乃出。而適遘諱。不易歸。安人歿。諱亦解。鄂州始得乞歸。鄂州於所後及安人。可爲兩無憾矣。安人之歿也。春秋逾九十一。固無他疾。其歿爲萬曆某年月日。其葬爲某年月日。合叅政公於茆山。遡其生則爲弘治某年月之某日。子三人。光國子生。娶山陰劉氏。狀所稱偕早亾者也。焜以父次薦。補鄂州府判。以文飾吏治者也。娶陳氏。亾。勿繼。嬾諸生。母則

庶狀所稱安人視如己者也娶餘姚汪氏孫十一人
曉始諸生又他爲某某曾孫九曰百順者爲諸生他
爲某某玄孫一曰千生女二一適會稽章某新州衛
經歷一適潘某福安縣丞孫女一適謝某曾玄女凡
四而曾居三銘曰

母德皞皞而享齡以耄母不幸而早歿顧代治家
以孜孜然則耄之享不勝代之勞矣噫人亦有言
難成者嬪之道難必者子孫之肖母兼而有之是
謂享溢於勞

去聲

蔡公名賢俟母茆山不負公托寧

不解顏

言檢校墓志銘 少語涉趣

山陰之有言孔門大賢先生偃齋也世吳人居常熟
至宋兵部侍郎雲徙祥符五傳至通以敷文閣學士
從而南遂居山陰某村卽今所云言家堰者入明
七世祖提舉廷臣生志江志江生慶慶生肅始入居
紫金生文思文思生松江府檢校論字某松江幼敏
秀有志節學明經不成去學書善分篆卽章篆禁署
諸體靡不兼又爲人特謙謹故鄉人禮部尚書諸公

翰林時携以北入粟爲禮部儒士館閣中稍知愛之
自承 天志 肅穆兩朝古四禮及今 上吉禮文
武會試凡涉書者靡不出其手嘗一賜銀絹一以禮
部役得預 宴慶成諸大臣兩薦之幾中書內閣矣
而一以父喪一以同列相援冒阻竟就常秩得檢校
松江在官幾年惠愛謹廉然無以殮居常砥筆伸紙
吟嘯松篁間博長官清譽而已其爲布衣嘗爲友朋
散其貲以百計母病藥有宜咀者頗梗咀自夕至旦
頗盡腐不知痛在禮部一日思省而歸及聞 詔輩

選中書。往而後矣。禮部公訝之。曰。母病始瘳。不忍遽去也。歿之夕。屏閨人戒諸子與諸僚。決竝無失語。是爲某年月日云云。銘曰。

於乎言松江耶。始冀以文顯。不得而冀以書。書幾顯矣。不得而竟。垂翅於幕中之際。噓之者盈朝。而終不免於枯。文學之傳家於乎。將執管以從地下之子游耶。

張太僕墓志銘

代

公姓張氏。名天復。字復亨。其先蜀綿竹人。宋咸淳中。

名遠猷者來爲紹興守卒葬山陰遂世爲山陰人四
傳而有福福生仕廉仕廉生原旭原旭生恭恭生宗
盛自福以鄉進士爲州學正仕廉以隱謝高廟徵
其後三世俱襲爲長者行宗盛最少子曰詔以公貴
贈吏部驗封司主事與其配趙氏贈安人者公
之考若妣也其賢具少師華亭徐公志中贈公三子
公最少而變生贈公以兩伯子旣儒欲令公治產公
爵而啼乃始令就儒及冠補縣諸生文輒出諸生上
旣又工古文詞華亭公行學得公製太奇之置第一

名峻起弟子從游者滿門縣長吏委以志事山陰之
有志自公始當是時贈公早世公悉自營凡祀先奉
母治圃飾廬宴具玩供靡不雅瞻宛然富人之居紛
應有餘文復銛銳嘉靖癸卯舉於鄉予從公後及宴
鹿鳴念贈公悲不能筮丁未成進士明年出使江西
歸侍趙安人數月乃北已而哭其訃於途幾僵而值
庚戌服除謁選授禮部祠祭司主事時制誥兩房
乏文學士內閣以請吏部首上公名改吏部驗封司
主事入典是役一時命詞多出公手館閣稱其能

既滿秩吏諸司謂公多壽遷兵部職方司員外郎再
遷禮部主客司郎中尋改儀制時肅皇帝英察而
儀制又多事若嘉善公主下嫁莊皇帝大昏

景恭王就封國並大典公踵當之無缺事又儀制多
吏奸公悉考所掌爲成書吏不敢動會光祿少卿缺
計資當公公固謝乃外補湖廣提學副使湖地數千
里士居遠府有十年不被校者公居三年兩徧之於
士有恩校涉復洞敏士視公猶父監臨者剗公亦擬
公爲神遷江西右叅政明年壬戌以考左調雲南副

使時沐氏縱於雲南，撫按諸公爲國杜未然。稍束以法，公佩按察印，沐氏不法狀多經公。公操頗急，沐氏啗之已而武定亂。詔進討，公監左軍。武定平，上功公當最。同事者欲攘之，會公遷甘肅去。雲南撫按者皆新代，啗者攘者謫遂行。武定功且寢，顧撫索公他癥，今萬里走對雲南。時予方撫貴，公以伯子元忭隨過之，僂然相顧。予與公語，徒鼓壯令行，中不能不爲公危。及至，則雲南父老獠夷輩投省臺爲公陳枉狀，旦夕問餽如視所親。尊官追疏中被斂者，使言狀。

人人指天日言無有欵具以上於嘗疏公者亦爲一笑諱曰若是則首發者且謾而負矣奈何是語也上下共聞公遂得免歸歸而拓鏡湖中舊業以娛嬉托於麴蘖揮翰賦詩種魚灌花舟輿陟泛消壯心遣光景嘗遺予以書曰吾爲公置數椽於鏡曲令可接炊烟終當相與老於此也未幾公伯子魁大廷官修撰公年踰六十益自喜召客嘯啄觴豆日淋漓顧得痺公初免歸尚奪職及是伯子請以已官贖公職詔許還公欲歸壽公又爲陳君臣義輒裝輒以書止

明年聞公瘁歸益決得請居一年予適奉南命過

家候公而公不可爲矣數就牀語嗚嗚者凡三日竟
膜嗟乎嗟乎公生平多義氣急人患難人往往負之
亦不愆遭大事益從容氣不加揚而籌立辦幹短秀
少願乃旋折中禮語話恬雅真有儒者風卽岸倬遇
之亦失所據與人無少長賢愚率欲歸之於好其在
族屬雖疎必厚友朋之急尤出等夷嘗見其解帶以
贖一老交於官鼓頰呼輿孜孜不避形迹至爲酬謗
者所訾不惜也雖然人徒能以影響訾公耳而執文

綜裕出而潤國歛而藻身如所著鳴玉集湖志縣志卽文士雖在仇不能不使之屈首讀南詔之役以罪酬功雖首發者不能不使之以枉自引則於公果何如哉以故人相語曰彼曷此盈天之準也伯子之哀然當公之歸隱非準乎噫公可以慰矣公生正德癸酉九月十二日卒萬曆甲戌八月三十日享年六十有二配封安人劉氏生伯子卽修撰君娶王曲阜大紀女仲元憬聘高給事中崔女季元恂聘沈舉人大綬女女一許聘予子淳卿皆側室陳氏出孫男

二汝霖娶朱翰撰賡女汝懋聘王生應禎女孫女一
許聘范比部可奇子紹裘公博諸詮尤精於青烏子
天柱峰官山壩之穴公所自營也伯子將以是年十
二月之二日奉公蛻而藏焉索銘於予予涕不能字
且謝不副伯子亦涕曰若是則孰銘吾大夫銘曰
急人之難而忘其疾藜僇力於師而謗興於憇苴
始焉曉曉終則熙熙斯言也豈婚姻之私

賞無極墓志銘

無極君諱某字某其先金陵人始祖卿相元元亂客

會稽人遂葬烏石山。子某生，福建副使某。某生某，某生某某，生某某，某娶陳生君。君始儒，及長棄去爲吏。於縣清謹磨滌，務去其吏中故套，以故縣長吏多稱之。每語及必曰：「清吏其後敎官典無極。」史不改，乃謝室家，跨一驢，隨一奴以往。至則敎民益種榆、栗、梨、棗，右禮讓，左武力，有古循吏風俗。奉佛，悞坐白蓮教，收數十百人。主者以屬君。君悉明其非，是並得減。會國喪，長吏掩捕色服者數人，將贖其錢以充一公饋。以屬君。君曰：「貧儉耳，貧何以備縞？」然長吏命不可拂也。徐

起取俸錢代色衣贖里有盜卒謝盜不爲里中民一
夕復被盜輒循故跡竝指捕謝盜不爲盜者充君調
知其然釋之里中民與被盜者相與出望語已而真
盜者敗里中民被盜者始相與共神君君在縣五年
以老乞歸耕於野築室課諸子讀書無他營然起貲
驟至萬乃得於儉勤非官中物也自無極歸七年而
卒爲萬曆某年月日距生正德某年月日娶戴子男
四人曰心曰志曰殷曰懃心與殷襲公業其二子則
一爲府諸生一國子生也女二人長適某次適某志

與從子游者吳生某善擇地從其卜某年月日葬公會稽日鑄嶺二十里爲兆嶺之神道路山遂因其來托銘銘曰

人亦有言。筐筆必貪。幕秩鮮廉。質諸賞君。其殆不然。人亦有言。官廉實拙。歸費實訕。孰知賞君。貲甲於邑。由斯以觀。廉何負於吏哉。

沈布衣墓志銘

君諱輅字乘殷世山陰人曾祖某以德隱致有司旌其廬生材材生某娶於某當嘉靖癸未而君生年十

二母歿事繼母孝終其身不聞有貳嘗客燕許貸他
郡人錢千緡矣有以道遠易負間者君曰得錢與失
信孰重卒與錢居臨河值宗人兒戲溺水君裴而出
之俱不歿其後與婦翁赴其內弟之賈所至清河舟
壞水冒婦翁君幸在舟外得自救以免乃決奮走舟
中救婦翁俱歿矣爲隆慶己巳秋歸葬會稽中灶陸
家塢君娶吳生男一人曰某女二人長適某次適某
某娶王生男三人曰某某孫女一人君雖布衣然
以謹亮重於鄉精書學善奕算其所娶吳卽從予游

吳生某者從姊也某因之亦游予故來請銘銘曰
救兒而活事如脫虎人舉以談色鮮不沮及救婦
翁况蹈大川君奮以趨顧猛於前先親後生耿彼
筌篚我爲銘之以戒夫偷者

陽江簿潘公墓志銘

公諱某字克敬其先金陵人赤烏中仕吳爲郎曰樂
安公者始徙會稽迨元明間而有志道三傳而爲
公考某有子三人某弟澄無子公後之欲使公殖貨
公曰先世竝巖居無是也乃別用讀法起得主簿廣

之陽江而廣固渴才吏諸大吏爭得公巡院者爲休
寧洪公垣知之奪使攝恩平及行恩告書得數百紙
評曰攝固才寧不辦此悉焚之公又自放寬歛及流
遣十餘人聲大起後巡者顧惡其然檄使諸大吏苛
按公無他狀幾敗而免簿職邏故事歲一行鄉落必
塞橐而後返公到痛一屏格至是當代覲諸鄉老
連括三歲橐持酒醪以贐公公固却諸鄉老涕曰阿
翁耶都不記曩苦廉而得按耶奈何持空橐走萬里
道卽饑何以飽旅店耶公始勉爲什一內之歸以其

于貸族故之寡、每報逋笑、不問其始甥渭也、誤以文、
不賁聘、女、死、待之終其身、不薄也、公始云云、銘曰、
小吏而苦廉、食幾於無鹽、孰使之鹽、大吏則然、內、
橐也以祖、卒散之也、如土、仕之儔、指可數、渭也、斥、
晏、鄙其不遠、則負公館。

都昌柳公墓志銘

字字精嚴而銘語特趣

萬曆二年閏十二月之九日、都昌柳公卒於官、明年
正月八日、其仲子澂至自都昌、余哭之、問卒狀、得詩
七首、讀之、余喜其達、爲罷哭而一笑、越五日、仲子抱

公之履來索志與銘余告以不可故仲子哭失聲余
曰諾余聞都昌公始生時其尊人方芝翁夢祠山白
霍神君者與之子神君張姓翁因呼公曰張壽郎六
歲而就傳書一覽卽記至十一益知經義善文越四
年髮始總入校爲弟子巾衫騎導獨映街市聲名一
時起郡中每出人盼睩羨獎若覩瑞異使者行學有
司歲課非甲其名則甲其等人皆謂公風雲在履舄
間惟恐其不加趾而載也如是者自嘉靖戊子至乙
丑而竟以貢入訓高郵三年遷諭婺源又三年而知

都昌三日止矣。嗟乎公生平貌若不勝衣。然所至以文學屈服人。如長平細柳。大將旗鼓。卽相君鎮帥。下至專城靡不降氣。願得公一字者。世以此遂謂公取才弘。故招忌盛。卒齟齬於一第。侶矣。抑獨不念公篤致倫誼。如糜股以療父。婉容色以悅母。同爨以食兄。弟者此猶曰人或能也。至公數遭困窶。乃昏聘不使子先其姪。乙卯癸亥間。後先學使者兩貢士。兩越次。將推挽公。公再三孫同舍生曰。某某老矣。生何忍奪此。豈人所易能者哉。是德也。非直才也。猶不能贖忌。

而準弘又何耶。於是始有緣此爲公屈者。而公臨訣
顧自引無術以報主上。至形之詩。公真盛德矣。公
著書數十卷。其所造有劉向王通風故尤宜於教。有
名郵葵間。以此得殊薦。知都昌。然精亦瘁於郵葵矣。
先卒之五日。夢與故人約往匡廬訪青蓮居士。曰。當
於是臘之九日。寤以語家人。遂却藥。及期。索管書詩。
呼衣笏。笏誤以象。顧命易之。始執。且被噫。亦奇而正。
矣。公名文。字彬仲。其先河東人。兩徙而家山陰。登洪
武四年進士科。曰汝舟者。爲公遠祖。數傳而有江西。

按察經歷青青生顯顯生廷蘭卽友芝翁娶王氏生四子公爲仲公之生當正德甲戌至是爲年六十有一娶齊夫人生子五口洁光滂潑潑並儒女三漢潔澈孫應模以下五人孫女二人曾孫一人淵於公爲中年交然誼頗不淺故相期者亦深處時日夜握手語及出時時寄書來書中語未可一一爲人衛也今不牽止此矣其子知之故繆以瑩後托瑩在某所目某年月日封銘曰

來○白○崔○耶○返○青○蓮○耶○之○人○耶○凡○耶○

傳

曇大師傳略

師姓王諱貞燾號曇陽子太倉人父禮部侍郎錫爵母朱淑人夢月墜牀孕及產師女也母偶立而產不覺亦不血時爲嘉靖三十七年戊午十一月二十一日至萬曆八年庚辰之重九而師道成立以化紅光亘天趨而仰者約滿十萬衆按傳師之成道也悉由諸真諸真者多不可紀其最專教者則爲偶霰嬰朱真君師之得會諸真也始夢中三四至後則晝至亦

多不可紀大抵至則光滿室雲來霞往千侍萬從珮服之麗容色之都以至鈞樂妙香瓊漿異果若橐携身首之飾瑰寶金玉織繡不縫洞蕭筆螺瑛瑤紋刺去都贈留竝非人間所有師最後又神往西天謁觀音大士見七寶蓮臺謁金母見宮觀殊絕意卽瑤池則疑矣矣曰非也凡人道所由成修行表也享景影也師修行孜孜自人倫始表正矣表適正影適歆世寧有是理耶又師諸從父子家庭間所訓道及答簡藥諸士人病竝非亞聖小賢所辦孰代之哉諸所享

景莫謂止此卽百倍此又奚恠世以師中魔魔不當終不敗師以師自爲魔師不當終不中人以蛇爲妖者苟聞之亦用是廓如矣古之有道者伏龍于鉢醒訛法者干狐亦妖耶謂龍與狐妖不可謂伏龍與醒狐者妖可耶此皆不足辨獨師初擬化朱真君來慰旣云別遠不過三月師何用再拜輒嗚咽及果化計別日正滿三月會不在須臾耶又何用西向四拜曰吾以酬朱君似朱則住世師則辭世永不相覩然者此則非淺昧若渭者所能曉渭曩妄解伯陽書與師

八戒中旨偶相合頗以一班爲幸後數閱師傳中事
奇甚其不當疑亦明白甚獨昧而當質者有如此補
一語于末簡破愚蒙與衆共之倘亦聞教者所不吝
耶

錢先生傳

錢君諱士禮字汝行朱武肅王鏐十九世孫也母妊
時父夢仙人乘雲入其室持朱匣中錢一緡與之是
夕生君生而貌修偉習禮翼翼未冠母歿以禮治喪
不用俗尚嘉靖中方用兵苦繇先生以孤子辨吏徵

以其暇治經課卒補學諸生里人莫不多其約而能
禮與學先生性復孝從大人有鬻鑒者貧以其遠祖
像飄須者縣諸藥館充思邈君見而愕然肩數斗粟
易之以歸祖母老病盲常不樂君特用語笑以中其
好得喜乃退以爲常久之父病疽君則晝夜忘食寢
百療百不能驗乃躬自吮其疽果愈然瘁亦藥此矣
百逾年竟不起噫此其大者也其爲人好施睦鄉里
喜親賢士大夫而善遠俚俗教其子有塾法無吝貲
其後君卒幾年而子果賢書薦

論曰世之傳士者多用皎皎赫赫不爾謂不足以振世不傳焉於是中庸之士多泯泯噫抑何謬耶夫道莫大於孝弟孝弟者中庸之謂也錢君以疽勞疽者不灰而勞者灰可謂孝矣故予爲之傳雖然仙人乘雲與匣中物而君生推是祥也世不以爲大貴卽大富而君獨以孝顯不可以卜天之所右在此而不在彼耶

王撫州傳

森次有法

後世簡補庶工之科而兼言與判與書三者固矣然

身亦不廢。夫身者貌也。貌者外也。用外貌以取人。其殆守古者角犀豐盈之說矣乎。至于今因之不改。故長吏者簡補垣臺兩曹。而簡者或稍以身兼受。簡者則專以才自許。是以兩不相直。今撫州王公名燮。字者嘉靖壬戌間。以進士拜行人。其之四方也。辭命雅循。禮儀率度。而貌亦端秀。中畫圖。今其家有之。可請而面也。獨癯且少頤耳。鬚朗疎如竹然。風則不大能飄。兩曹於此物亦貴飄也。公以資當受簡。宜補兩曹。坐是失兩曹。得兵郎。久之丁外艱。服除。人補而

兵郎與刑亦稍嫌甲乙適兵郎皆具無闕員當候公
請於選長曰某母老矣某願竊郎資以養母不願必
兵郎也長賢之會刑闕郎遂以刑補久之出錄江北
囚而鄉之姦某甲者善媚公素直腸不好猜會江北
富人某陷大辟誤而寬甲偷往致之直間以微語從
容伺公所向公覺亦借他語以飛擊之旨甚峻甲懼
趨出公計甲曰吾不知彼饕者也、不飫不止、卽厭逐
之、如拂蠅然、還而黥物於闇、且奈何、則佯召之爲好
詰曰、我有關於楚吏、汝信人也、持吾符以往、事不竟

不得歸、而別以書致楚吏曰、某至爲我遲之、饗亦佯
裝辭去、實陰留其家、公赴江北、道出杭而饗故嘗所
致富人資、與持資來者、知計不得售、乃日擁歌姬飲
於杭、邏吏卒捕得之、銀滿一鄣筐、以告吏、吏曰此大
盜也、獄竟且笞殺之、公聞趣乘告吏以故、且曰、索其
家、或其寓與身、囊中有符可驗也、索符驗、日月果亦
滯饗於遠者、而饗亦得以非大盜不竟死、幸酬其本
辜、公赴江北、錄至富人、公罵之曰、駭囚、據爰書女當
活、今不汝活、女知之乎、揖庭侍長吏、及諸有司、告以

故諸公無不罄折嘆服公。公還出知撫州府。而大吏分曹守府者一小吏。其戚也。橫公撻之。守恚曰。撫州不有我。撻我戚。陰令戚來饋。茶盛囊物。雜茶篋中。公又發之。守者益恚。直三歲當考。守以考書中公。而公得罷歸矣。公歸。方艾。某兄某之女。公長子某婦也。當公艾之辰。余兄以余文往賀。賀之軸有程不能博。文不能煩。若家志煩可也。公之弟某嘗志公於家。能煩而盡矣。而余復次公之事以傳者。發三事之意也。然公與某嘗會飲。或時及江北事。每以不活彼富人爲。

恨曰、聖人事至公、何避嫌爲、則知聖人事事不避嫌、
鄙遇一事、可嫌者、輒避之矣、又曰、禮儀不愆、何恤於
人言、又曰、畏首畏尾、身其餘幾、鄙其畏之哉、恤之哉、
噫、公爲斯言、長者之言哉、

史氏曰、余嘗讀春秋、孔子自責、有云、以貌取人、失之
子羽、子產謂馮明曰、子少不颺、子若不言、吾幾失子
矣、夫孔子與子產何如人也、猶不能以貌知人、況其
下者耶、若夫聞其言、則取不取、特在準其言、不必用
貌矣、公司行人、又無一言耶、判卽言也、無一判耶、噫、

悲夫公孫揮字子羽、澹臺滅明亦字子羽、公貌不爲人知、似澹臺滅明、公始官行人、官則似公孫揮。

貢氏傳

貢氏某處人、嫁郡諸生某、某某地中名士、貢助之方成學、願嬰疾且死、執貢手曰、吾不能偕子以室矣、欲待子以穴、得手、貢泣曰、幸而更舉案以從、妾之願也、卽不諱、妾有把巾握帚、爲君除棺中埃土耳、不待我以穴、將何爲、某遂瞑、貢則撫其所遺孤女以居、未幾女亦死、母憐之、則來相覘、慰曰、一嬰髮不能有、而欲

子以終身可乎。貢則復泣曰：良人穀而不後天也，若守節則人耳，乃剪髮以誓，母數迎之，偶爲一歸，值女弟在，亦用是以覘時方食，取食器碎之，忍饑以還，罵不絕口，自是人亦不敢更諷以一語，閱四十乃歿。蓋年六十矣。生殷某者，貢夫從子也，數爲予道其事。且曰：貢之舅萬忠烈公歿國時，貢方龀，人哭公則哀公而已。至貢則獨收涕曰：舅真得歿所，舅真得歿所，而貢之歿前一夕，有大火自空中流，墜其室，南衆詫馳視之，則不見有物，咸以爲殞星云。

論曰自古懷貞之女與抱節之臣其成其志也不在於勞面刎頸之時而定於咸夢徵姪之始辟之於玉可碎而不可使隨蓋自山川融結之初而已然非試於投擲而後知其然也故觀於貢之哭其舅於配也而不負其夫於穴者可知矣然某以其短貢以其修而後貢斯顯使修短均也求顯貢得乎凡若此者豈天將成其雌必故虧其雄耶抑適相值而然也噫亦邈矣

吳鴻臚君傳

吳鴻臚君某字某徽之休寧人生有異稟貌端偉穎
悟過人長而習制科業方有名於時期鵠舉其翁顧
喙曰吾老矣汝兄旣入仕而諸弟方幼卽令汝早自
翻飛獨奈何令我日暮而不墜耶君大駭遂東閣其
簡牘持籌而算貲益竣無何諸弟稍立而海上寇初
起漸熾君負素所抱鷹鷂姿復揭揭不自揜思一決
其條籠而試以風飈乃補國子肄南監久之不得志
始就拜鴻臚丞孳孳其職將以資勞希 天子恩澤
幸易章服以爲父母榮不數年而父母相繼以病歿

於是鴻臚君乃決意不仕。結廬錢唐之西湖。往來鑑黃間。習河上公術。賞弄風月。杖履舟楫。無日不在佳山水間。用是以終其身。至是其弟某走吾鄉。抱鴻臚狀索志於某君。予得見之。拜我於廬道其事。令傳予爲取志中之大者作吳鴻臚譜。

論曰。人有借耒鋤於其親而德色者。此固不可以言子至壽已之素抱。令令青雲而之他途。則亦難矣。吳君之奉父以逸。而寧自小其成。至其末也。又以不能奉父以榮。而徑自止。卽小者亦不自竟。傳所謂終身。

慕者蓋庶幾其人耶。或以其晚年習墨，購詭正道，然當其抱策學南監時，祭酒呂公某奇其資，授以河洛君習之，深有得。噫，茲豈詭正道者哉。

那鑑

辛亥十月十二日雲南遣吏迎餘姚趙都御史錦者爲予道此其人名楊時學

雲南沅江土知府那欽嘉靖壬寅間死。欽子憲年十二，三叔那鑑者撫之，將不利於憲。憲父之土日走告沐總府，若撫按二院以狀。乃檄憲來省下，使讀書習禮。始至，髮垂耳後，十五六髮可總。總府及兩院者相與議，遣旗牌官一人指揮知州各一人護憲歸，取鑑。

舊所攝印以屬憲、鑑持印久、若忘其爲攝者、以爲奪已也、又以叔故、於是盡割掠憲庄資別宅而居、而陰賂憲奴、使謀憲、約事成得印、則奴亦得爲招霸、且重賞、招霸者、頭目也、於是奴果夜鎗殺憲、却上狀臨安兵備、謂憲通他奴婦、而他奴殺之、乃反別執未嘗殺憲者、斬其首、剝腸巴屍以來獻、憲之舅曰豐鸞、及憲之日、曩爲憲心腹者某、以其事告總府、及兩院、事下臨安兵備、兵備難之、遂兩可、謂仇殺土夷常事耳、况叔殺姪、遣官用好言諭鑑出印、與流官通判者、且掌

之官數輩往返鑑直人與金二千兩官或受或卻受者則罷卻者卽毒以死或受者持金首臨安不首者發則輒得軍罪然兵備臨安者亦往往幸期滿而去庚戌王巡撫某林御史某奏請征之 旨既下而台

州石以才往代王巡撫爲巡撫而沅江天熱瘴甚四月至八月不宜師而不顧用四月調兵馬以入兵果困入沅江者當兩山險而夾一道鑑揭一邊道沿爲濠引山水注濠令軍伏山莽中我兵從道入則伏者往往鎗令墮水則益困分守分巡兵備謀於石公石

公乃謂左布政使徐某曰。如是奈何。布政曰。某願往。
乃與三哨者俱而已。獨先意馳數騎。幸見鑑。可撫則
撫。否且令壯士急縛而馳。微幸於卒然若卒之攫也。
以故留重軍四五里外。自則戴喜鵲窩壇帽也服紵絲

短袍。羶衫布襪。帶劒與土舍離鑑知之。遣流官經歷
某迎公。袖出路銀二萬兩帖。徐將刃之。經歷怖而走。
頃則生員數輩至。謂公曰。鑑且出降。誰願爲鑑。公叱
之。又走頃。則驟聞鼓一聲。鑑象馬俱出。皂隸持牌者
顧謂公曰。爺莫前。徐又叱之。挺刃使前而兵交。土舍

高國者百人敵也。衛公騎見事且急，乃徒手關殺四囚。徐尚曰：「好士舍好士，舍賞千兩，時則雨，鏹中徐勝亦再呼曰：『國救我國，救我而公與國俱歿矣。』」然楊時學曰：「公不微服則不歿。」

嚴烈女傳

嘉靖辛未，渭旣交于湖歸安潘君，鈺特誼。次年夏五月書來，且曰：「爲君求得繼室於鈺縣雙林鄉實嚴翁某長女。某翁父故某府知府，某同產兄弟也。渭見嚴翁與語大悅，許女焉。及察其動止，顧私獨以其駉也。」

固謝之。其後四年，倭夷寇浙西，入雙林，遇翁，斷其一臂，翁歿，乃牽其二女俱去，行若干里，許過某橋，長女初許渭者，奮投橋下，溺歿焉。浙及他道自有寇以來，婦女虜其還者以千計，而女獨歿，難矣。事聞，渭痛之如室焉。且悔以爲嘗其時苟成之，或得免。然天欲成斯人，名渭獨且奈何？疑其父而及其女，而不知其生而悔于其歿，其可及乎？作嚴烈女傳。

孫山人考

此能道太白縷縷是一大証據

孫一元字太初，別字太白山人，其家世士流也。父早

卷之二十二
三
亾而貧，山人以抄書役某府中，爲母養。夜歸，則燈以
點閱他書，毋恠之。山人詣母曰：「此兒受府公命抄書
也，何敢誤不燈？」久之，府公知而嘉之。會吏缺，爲出貲
特補吏，且試以密事不泄，多任之。會覲府，橐白金兩
四百，使山人致布政使某，途被盜，山人無以報命，遂
亾。抵浙，寓西湖，稍出其蘊，詩名一時，遍海內。久之，贅
湖州，施舉人某女弟，僅育一女。久之，山人竟卒。施家
諸名流爲山人傳敘終，莫知其爲何人也。或以其跡
秘，妄用意揣，醜垢詆之。昨歲休寧范君名燦者，匣其

祖所蓄交游書札及他諸文字來謁予題而山人所
札在焉問之燦能道山人所由來跡予詰之燦曰孫
山人與燦大父世交也予曰向孫山人苦秘其所由
來卽世交山人乃肯泄於乃大父耶燦曰非也曩嘉
靖某年中丞諸暨之縣者曰孫鏞罷官貧不能歸客
寓楊州之江都而燦大父世商於鹽遇鏞頗傾蓋一
日偶及山人事鏞大慶駭一一道山人所由出亾事
大父鈎致鏞山人形貌云何鏞曰如此如此鏞又曰
鏞父伯叔名某也字某也便走取所隨譜合之果合

鑄以告其子某并携其子某來子貌亦稍似山人鑄
遂問燦大父云我叔今何在燦大父云云鑄強我大
父偕至湖拜其世母施并其已嫁妹三人相對而哭
失聲左右亦無不涕者萬曆某年諸暨志來予閱官
師表嘉靖十二年所列官師表縣之丞果孫鑄也乃
曰蜀人而山人舊自稱秦人非志者誤秦爲蜀則山
人本蜀人而謬爲秦人也蜀西北通秦界或山人亾
時始由蜀踰秦客寓太白山已乃抵浙耶當問諸修
志者

外史曰：太白山人初以抄事府，再以吏，此蓋不足垢累其終身也。終山人之身，豈徒以詩重，寃其履庶幾沈雲卿之流歟？戰國有侯生，秦漢之際有張耳、陳餘、竝監門小吏，餘且受鞭笞矣。鞭笞亦何足爲辱？然耳餘慕富貴者也，况得語於太白山人，冥冥鴻飛者耶？失金而逃，遂失吏天之助，山人厚矣。

難者曰：銀之兩而千，爲觔六十四，昇須兩壯夫，兩滿四百幾半千矣。府遺此，必不靳兩夫。然則當盜際三人同亡耶？卽亡府一不逮繫其家耶？曰：予以公事揣

也。此特府私耳。弘正間，於私爲諱甚。府托孫，必不令
六耳預聞。孫不歸報府，府必諒孫非負已者。其不歸
必變生不測耳。又安知孫亡走之後，不有展轉飛密
以盜故報府耶？諺曰：狗噬盜，痛不號。府逮其家，則號
矣。難者曰：子何信之深也？曰：燦何預辨以待我。

徐文長逸稿卷之二十三

山陰

張汝霖肅之父

評選

張維城宗干父較輯

王思任季重父

祭文

祭九江封君

嗟嗟先生鄉之耆碩隱於釣耕遠迹城郭既謹取予而愼然諾鄉人評之謂古太樸天降時雨山川出雲神啟翁衷於焉北轅邦畿千里羣彥聯卷叔孟廟二一飛冲天高第大廷復膺翰選柱史特推郡堂妙

簡萊子迎翁曾孫養志丘壑之懷無日不繫丹旌來
歸觀者愴涕猿辛宦楚以日爲歲某彼小子潦藻薦
翁翁素恕容庶幾弗侗

祭李太夫人

代

天啟名世必稟鉅資匪直父道亦藉母儀名世伊誰
我公佐辟維太夫人以誨以育當其誨公法度矩矱
非禮之事勿接耳目公則呂公夫人申國公仕翰苑
大肆文章旣爲國師造事有方公則文忠母維歐陽
公攝冢宰進賢退濁由母之言以知處嘿母維韓母

公則康伯迨公平章母益嘉慶多母福壽手詔存問
縉紳榮之車馳馬競母維晉國公則文定自家而朝
維母實勞自始至終維母極榮母生之榮天下所欽
知母之德維某最深令子明公不我遐棄庇覆提携
於茲二紀暨諸孫子桂茁蘭揚顧予塵襟每挹其芳
義切通家分猶子母聞母之訃寧不悲楚靈旄南旋
路出武林哭母於旅敢布下忱

祭何老先生

翁十八而名聞於吾儕又五而爲人師八十而猶客

燕邸又二而始橐以歸其溫也。玉其錯也。石故已攻
矣。而亦可以攻人其下也。籜其土也。檀故塞耳於原
壤之歌。而亦能事其大夫之賢。蓋廉而不見其劇也。
和而不見其不恭也。百世之下。聞風興起。意者庶幾
於夷惠之間。抑翁之始終大槩云爾已矣。而其彬彬
班班。綠綠。焚焚。若唾者之霧。下卽更僕以數。不給也。
而况得枚舉於數尺之誅之云云。於乎。下有蒼龜。則
上有青雲。以覆之。天有醴泉。地有琅玕。鳥則有鳳凰。
以飲之。味之主有鄭公。客則有康節。以左之。右之。矧

遠游之一日、宛坐駢於奕棋等堯夫之觀化集諸宿
以長辭殆同源而異跡又何可以雄雌於乎恬耶安
耶惟觴與咏大耋以終其年耳蟻則慕之而已何嘗
澶耶既多男子荷且騫耶獨屢空耳堯夫在昔有餘
緒耶翁固無憾翁無可唁乃吾儕之聚哭也不幾於
累翁之天耶

祭羅封君

代

惟翁太古樸致盛世逸賢蘊德高蹈好爵靡干長公
嗣之瓜瓞以綿教以義方授以家傳大庭首舉允矣

哀然翰苑蜚聲。展均陶甄。南北事寄。宗伯衡銓。辟彼霖雨。翁先爲雲。辟彼溟海。翁河以源。辟彼嘉玉。翁璞以函。辟彼良金。翁鑛以緘。公旣大用。翁亦蒙榮。家庭趨鯉。溪山臥龍。翁胡厭世。披髮大荒。而俾長公。弗究其功。四海舛望。朝失股肱。閔予小子。叨公門屏。竊宰畿疆。割雞製錦。感公之知。不遑食寢。佩公之教。惕焉惟謹。公丁外艱。以職曠臨。豈月屢遷。何以爲心。敬遣一仵。陳詞薦藻。臨發南翹。不勝悲悼。

潘承天祭陳封君

於維太翁間氣以鍾孝友睦婣姪恤兼縱

平周賓六聲

德翁無一歉緩急扣門拯人於險學優厭仕弟子如雲執經問難若後而睦裹糧就道負笈擔簦不遠千里扣陳先生如饑得黍如渴得漿各充其量滿腹而行問詩問禮長公庭趨羽儀天庭出其緒餘長公旣貴公被榮封高卑俯仰乃如未榮郡邑大夫再屈更老衆人嘖嘖翁自耿耿長公理泉不茹不猛翁亦勉之肺嘉宜謹長公掌故於彼晉陵勉以安定兩齊是程自壯而老自老而耄著書簡帙山竹可竭及其華

也危坐終日垂訓萬言枯樵手澤於乎若太翁者寧
非席上之珍人中之傑也耶某忝松蘿翁教實多棄
某而去傷如之何

與諸士友祭沈君文

嗟乎哉公之奇塊超卓芳鮮而磊落也將古之人疇
可以擬之耶英年茂學高蹈賈生請纓係虜齊軌終
軍借劔斬佞抗蹤朱雲惟斯數子吾方以擬公於生
而公之歿也詆權奸而不已致假手於他人豈非激
裸罵於三弄大有類於撾鼓之禍衡耶彼數子之駁

矣。敢望公之醇精，矧遭時之方泰，依日月之盛明，乃遽罹於慘辟，胡天道之足馮，豈蒼蒼者將以短公之世，而欲以永公之名，嗟哉奸魄永淪，忠魂不灰，絕塞艸青，掩公何壘，令子壯士，伏闕陳情，返公之骸，以妥先塋，以忠見僇，何代不有，所賴蓋棺事定，於久忌讒奢質，員走尚囚，今也聖明釋孥於收檜，擗飛罪待珂始原，今也聖明亟洗其寃，主仁臣直，父忠子孝，所係剛常，豈直光曜，聚哭傾里，朗誦哀章，將以激懦匪以悼亡。

祭馮母文

代

於惟太君憶其始生得坤之柔來歸於馮君子好逑
翁家郊野枕石漱流荷笠躬耕良田數丘太君餉之
相敬如賓孟光舉案嘆息路人迨臻中壽長子矯翼
一飛冲天太君微憚雖曰憚矣匪動色矣校諸未嬌
宛如一矣宗親或窘待粟而炊他或厭倦太君嘻嘻
細至臧獲貴則苛細太君臨之兒女泄泄自郭至郊
靡不合掌太慈後身具水月相集等何幸友太君子
太君撫之視子無異子也按滇遠在萬里太君疾革

待訣忍死其等聞之幾欲掩耳郭南藻瀟太君所臨
有齊季女嘗禴以蒸棗等豆俎亦藻以淪太君歆之
恕其菲薄

祭陸錦衣

代

余讀昌黎所爲馬氏誌述其曩時見司徒公之狀貌
猶高山深林鉅谷龍虎變化不測傑魁人也退見其
子少傅翠竹蒼梧鸞鵠停峙能守其業者也迨十五
六年而哭其子少傅於尚書之分司予每嘆此以爲
天之生人苟無意於大用之也則不宜鍾是萃美於

其身以爲有意於太用而鍾之也、則不宜奪其年、使
不得以自見、故凡如此類者、嘗置之以爲不可曉、今
錦衣君若其尊君太保公、非吾曩昔之所締交而親
見之者耶、龍虎變化、太保公其司徒之傑、魁與鸞鵠
停峙、錦衣君其少傳之能、守其業歟、粹美旣鍾、而大
用莫展、天道其可曉耶、予不敢自托於昌黎、而於君
之尊公、素辱通家之好、則哭之於幕中、而馳是語於
君之樞前、以慰之而已耳、

惟母惠質秀壤珠德潤潤并珩共師里閑推賢相夫
君於雁弋成令子於熊丸爰對大廷寵命首仙鳬
之選入班蘭省行人遶驄馬之鞭遡茲書之風教將
邁歐而比孟計鸞章之盛典諒自委而窮源朝入月
之有侶遂乘雲而上仙俾鵲鶴九仞之翼方決雲而
阻奮駿駒千里之足乃歷塊而停騫某等誼重年家
於冢君既黍手足之愛情同哀戚於吾母寧忘怙恃
之天苦宦游之旅食僅致禾蘋之奠念靈輻之就道
愧無臨壙之緣於乎痛哉

祭趙母文

於乎太君之佐少叅公婦道盛矣其撫左臺公母道盛矣而左臺公以德業致高位厚祿太君之享也盛矣年幾於耄壽也盛矣而其子孫輩幸姻於太君之子孫顧猶若不免於憾焉者乃特子孫輩之在他日當婚之時不及太君之撫摩教誨之也其憾也小也而某則以爲左臺公以太君之故不盡其仰報主上之隆遇以爲憾其憾也大也於乎尚享

祭朱刑部

南陽代

古今以家學相傳父子兄弟間自相師友者在漢則有桓榮與諸桓在宋則有太中公與二程最茂且顯矣其在我明固亦代有其人然宰相與者則刑部君其一也君仲氏翰撰公予相知最早甲戌役於禮闈自是始得與君知迺其家學之源君之翁泰州公猶桓榮之在漢太中公之在宋伯仲者其經猶之諸桓其道亦守二程之道也而君起稍晚方以廷對稱旨試以理其爲人又恭遜以恕宜其免早發先萎之災獲福謙持盈之報也而今顧止於此噫天之

道其可馮耶古今謂善閱文者卽文可以知壽夭不
特富貴貧賤予嘗閱君文理而粹無所謂不壽者在
也而今顧止於此噫文之占其可馮耶君往矣固有
不往者在至於予之悼君與同門之悼君固自有不
可解者在烏呼痛哉

徐文長逸稿卷之二十四

山陰

張汝霖肅之父

評選

張維城宗子父較輯

王思任季重父

雜著

徐侯去思碑陰

循良之政、清廉之守、二百年來、如公幾有、黎民五袴、父老一錢、立石懷恩、垂千萬年、

刺五泄寺石鼓

銀河墮流、觀者忘休、深林無人、杳不可留。

評字亦當存其字數

黃山谷書如劒戟、構密是其所長、瀟散是其所短、
蘇長公書專以老樸勝、不似其人之瀟灑、何耶、
米南宮書一種出塵、人所難及、但有生熟、差不及黃之
勻耳、蔡書近二王、其短者略俗耳、勁淨而勻、乃其
所長、孟頫雖媚、猶可言也、其似算子、率俗書不可
言也、嘗有評吾書者、以吾薄之、豈其然乎、倪瓚書
從隸入、輒在鍾元常薦季直表中、奪舍投胎、古而媚、
密而散、未可以近而忽之也、吾學索靖書、雖梗槩

亦不得、然人竝以章艸視之、不知章稍逸而近、分索
則超而做篆、分間布白、指實掌虛、以爲入門、迨布
勻而不必勻、筆態入淨媚、天下無書矣、握入節乃大
忌、雷大簡云、聞江聲而筆法進、噫、此豈可與俗人
道哉、江聲之中、筆法何從來哉、隆慶庚午元日、醉
後呼管至、無他書、漫評古人、何足依據、先生評各家
書卽效各家
體字畫奇肖
傳有石文

里優者持象索書

客有持此象者、謂予題之曰、此新建伯家館客李君

爲我傳者也。予卽象以觀其人似矣。因語之曰。今欲求似伯者如楚之似孫叔敖者。將屬之誰耶。

四時讀書樂題壁

雄讀書、春花滿、散朱碧、點班管、
胤讀書、夏風涼、苦
無膏、螢聚囊、符讀書、秋月隨、新涼入、親燈火、
康
讀書、冬雪厚、就以映字如畫

水神殿廻文燈詩

新架燈垂高殿殿、舊場毬、
闌芳年、春花有幾能希
賞、夜月無多惜早眠、輪迫馬蹄盤作陣、燭抽蓮葉嫩

如錢人游厭聽催壺漏客醉扶看墮鬚鈿

紀夢

歷深山皆坦易白日道廣縱可數十頃非麓名值連
山北陞衙署四五所竝南面而闔戍卒數十人守之
異鳥獸各三四羈其左不知其名予步至其中署地
忽震幾隕望山北青林茂密如翠羽亟走直一道觀
入守門者爲通於觀主人黃冠布袍其意留彼主人
曰此非汝住處謝出主人取一簿揭示某日女名非
渭此晒字是汝名也觀亦荒涼甚守門及主亦竝藍

縷

其二

時入匿羣山人家冷室而羣山乃壁河之東非西也韓生陪焉諸監移節羣城五百及客無數韓爲之耳目邀招以往童子隨者似東似一二客踵至輩僞揚曲至卒曳以行到一曲巷某日幸決某百等諾之不一百武羣山西上一白羊大可如一大驢而脚高遂一白大羊眼竝黃金色伯見之怖而反走誤叫曰虎來虎來某爲大白羊所鉗鉗項右不傷亦不痛十八年

五朔夢

優人謔

紅場銀燭劇崔張，劇竟場中燭不長。崔姥杜師生也，
張鶯耶紅耶兩女郎。無人不解罵鄭恒，恒言五人盡
惱我。我雖一人亦惱五。世間曲直不在多，一人真能
惱五個。劇技固小理則大，侏儒長飽方朔餓。嘲閑
笑帝座，臥規十五城。大鐵錯丞相者誰，公孫賀。

書馬湘蘭畫扇

前有九
故題咏

與題優等妙在日前

點綴而已

存不長遠
南國才人不下千百能詩文者九人而已才難不其然乎

戲題王雲山家慶圖

王父子俱能寫真

父畫子不像子畫父不真自家骨肉尚如此何況區區陌路人

吳伯子望雲圖歌

聳片玉兮崑崙，遶萬里兮何長。綳縞衣兮素帶，皓鵠舉兮鸞翔。奉北堂兮萱州，懷大椿之迅征。叶悲遐志之湏嗣，披選書于三冬。望流水與白雲，知孝思之無

窮

春日同馬策之王道堅玉芝禪師至寒泉庵偈

得偈一首

時嘉靖甲子歲

禪阿子坐方丈比丘尼往普陀連日碧桃留蕊一帆
滄海澄波西日斫柴歇斧東村搬戲打鑼種種寒泉
幻景念念此心波羅

吃酸梨偈

你也痴來我也痴那有心肝挂樹皮東海也無頻婆
果且留性命吃酸梨

題放鶴圖二偈

風鳶牛鼻孰堅牢、總是繩穿這一條、
借與老夫穿水牯、瀉山和尚不曾燒、

其二

紙鳶是真還是假、鳶繩是線還是絛、
今日饒君禽與鶴、他年難避鼠和貓、

菩薩蠻

爾

觀音大士蓮座既爲風所壞、觀音自然
站立風無奈、觀音何也、此戲謔三昧語

蓮花骨子黃泥作、

叶微

金邊粉辦觀音座、蓮性拔泥生、

觀音不惹塵、大風吹落果蓮花、沒處躲、語風莫賣乖、
觀音站起來、

榜聯

龍山隍祠

王公險設、帶礪盟存、八百里湖山、知是何年圖畫、
牛斗星分、蓬萊景勝、十萬家烟火、盡歸此處樓臺、

隍祠下殿

表裡金湯、卽擬黃河如帶、泰山如礪、而國以永存、歲
歲禱臥龍、瑞艸、

贊襄天地、要使雨不破塊、風不鳴條、而人皆安堵、家
家馴、堊鹿標枝、

雲門正殿

舉世間以日月燈方能顯相、乃知六根六塵六識幻
妄之由、消礙入室、何異散一漚于海、

在谷中見牛羊鹿、時出成羣、可証小乘大乘上乘、接
引之品、超凡躋聖、莫令虧九仞爲山、

雲門書樓

月色印床、乃心境凡塵一掃、

溪聲到枕正浮生大夢初醒

白家生

燕京義塚扁曰東慈義庄

義利關頭三岔路乾坤窩裏一家人

荷鍾任穿埋何必南枝方宿鳥

脫驂先故舊且于東越試眠牛

贈王海牧

王善制剛先生之門人

有跡傳青簡無名入黨碑

一枝堂

先生自晉追迄郡學

宮牆在望居三卜天地爲林鳥一枝

沈青霞先生祠

公道自然明日月。忠臣何意祀春秋。

開元寺大殿

擅爲祝釐之重。暫集衣冠。劒佩儘宜齋米。焚修况前
臨芹沼。後倚花封。竝稱高山仰止。念錫檀家。搬柴運
米。觸目皆證果圓機。切莫向糟丘畔。時酣花鳥。醍醐
看天堂立登。笑地獄枉設。

寺當輻輳之廛。則凡濕化胎卵。未免屠沽駟騶。若故
殺養生周貪恣狡。便墮涅槃無邊。今禪林輩暮鼓晨

鐘何在。非醜人。木鐸但能于枕頭上常見。麤牛齧棘。
許今朝入市與昨日不同。

五友齋

松竹梅蘭并主人

松竹梅蘭四君子。落落孤標誰可入。儂朋友社。
笑譚詩酒一老夫。寥寥寡合自應爲爾主人翁。

尊生齋

細讀襄王始信等浮雲富貴。
忽疑莊子何緣又舍魄鳶鳥。

小室

閉門留野鹿

分食與山雞

正義堂

書白家庄後

魄葬此魂無不之吳札樣傳今越冢
民同胞物吾與也北邙意合古西銘

鐘樓下關神殿

鐘閣爲鄰追蠡永啣靈響護

郡山作主臥龍重待美髯來

戲文臺

四美具二難并人政好逢場作戲

千金多一刺。少天何不轉。夜爲年。

贈某禪林

春風大衆迷花雨。夜壑孤藤看佛燈。

張水神

舟楫顛危。魚龍出沒。賈客但放膽。以須素患難。行乎患難。

平生忠義。今日風波。神明直舉頭。如在叫一聲。立應一聲。

望海亭

龍山頂前郡守洪公先書首句沈吟無偶先生適至因令成對大快稱賞

放眼于山外。無言一笑中。

教場關神祠

遺恨在偏安。未了蛟龍池上雨。
栖神鄰教閱。如聞泥馬夜來嘶。

燈謎

他字

問管仲

佯字

何可廢也。以羊易之。

州字州字

三點水六點水稱呼同左右異

蜜蜂窠

放之則彌六合收之則退藏于蜜

竹簾

不用刀只用篲勒碎風劈破月

走馬燈

但見爭城以戰不見殺人盈城是氣也而反動其心

秦字

二畫大、二畫小

卜字

上又無畫下又無畫

半邊銅錢

四畫一句不能成方圓又骨牌名天地分

一八

曲牌名一個

懶書

骨牌名一個

入不就

俗語一句

檢

又一句

忘入

井字

四十八箇頭

湯字

古人名二箇

曾點成湯

用字

上有可耕之田，下有長流之川，一月復一月，兩月共半邊，一字共六口，兩口不團圓。

孕字

先寫了一撇，後寫了一畫。

田字

四山縱橫兩日。綢繆富是他起。脚累是他起頭。

做影戲

做得好。又要遮得好。一般也號做子弟。兵有何面目。
見江東父老。

黃蜂 如夢令

舞處腰肢纖瘦。繡處金針斜透。歸到洞房中。羞見蝶。
雙鶯。偶知否。知否。命裡生來獨守。

燈毬

六箇姊妹閒耍。搭起鞦韆一架。高燭照紅粧。多在星。

前月下春夜春夜處處柔腸牽掛

花燈

四面笙歌鼎沸兩脚何曾着地只爲有情人遠在碧
雲天際迢迢迢迢流盡兩行珠淚

帳偶

有大人之事。有小人之事。一人之身。而百工之所爲。
備吾聞其語矣。未見其人也。

放鶴

疎兒意只爲功名半張紙臨行時慈母手中線費幾

許只要去扯不住不愁你下第只愁你際風雲腸斷
天涯何處

銃楔

有放心而不知求方寸之木可使高於岑樓

呆字

出自幽谷遷於喬木

觚不觚觚哉觚哉

四箇角四箇瓜頸上一個安得巧兩個尾巴象者少
似老非老似考非考似弋非弋似找非找

傘

開如輪、歛如槩、剪紙調膠、護新竹、月中荷蓋影、亭亭。
雨裏芭蕉聲、肅肅晴、天則陰、陰則晴、晴天之說、誠分。
明安得大柄、居吾手、去覆東西南北之人、行。

皇曆

模着無節、看着有節、兩頭冰冷、中間火執。

筆

少年髮白、老年髮青、有事科頭、無事戴巾。

酒牌引

錢之名號若形若文字若隱語若象物若改年蓋自

葛天軒轅

非有熊氏也

尊盧氏曰幣始以至於今所呼曰

收兒棍兒而猶未知所終也殆百紙不可了尤瑣者

漢武新莽隋唐間志也諺云財壓當行勢壓奴僮語

若墮駟儉然與貨殖篇什則下之百則役之及子與

氏所稱小役大弱役強皆天也之旨何殊哉終身爲

魚而求避濕無之也臯陶謨曰載采采微哉之哉庶

哉博徒譜錢四十某增十有八與酒徒共之其事則

焦革畢卓其文則諱抹子曰其義則某糟粕之矣

自半錢至
萬萬錢止

半錢 半輪殘月掩塵埃。依稀猶有開元字。想見清

光未破時。買盡人間不平事。

是陵女子
李氏詩

一錢 清風明月不用一錢買

李白

二錢 一夜水高二尺強。數日不可更禁當。南市津

頭有船賣。無錢卽買繫離傍。

杜子美詩

三錢 唐項仲山清甚。每飲馬渭水輒投三文。

四錢 賣油翁弄巧取錢置胡盧。乃反臂於肩上取

杓。油注錢口如線。注畢而錢四邊不濕。

五錢 豹皮下取五文錢買爪

六錢 臣愚以爲朝廷旣取六色錢雇役此最良法

蘇東坡

奏議

七錢

晚王衍等

八錢 趙克國疏云湟中穀斛八錢糴

若干斛則羌

人不敢少動

九錢 每恨陶彭澤無錢對菊花。如今九日至。自覺

酒須賒。

十錢 兩束焦薪僅十錢。雪深泥凍自堪憐。市城不

念清狂瘦。盡日廚頭不斷烟。清狂郭詡詩

二十錢 計然曰夫糴錢二十則病農病農則艸不

辟。越絕書

三十錢 才名三十年坐客寒無遺。頗有蘇司業時

時與酒錢。杜子美詩

四十錢 烏紗巾上是青天檢束酬知四十年白笑

平生臂鷹手挑燈自送佛前錢。司空圖

五十錢 郝子廉一介不取過姊家飯客留五十錢

席下而去。風俗通

六十錢 喻希學淮關志凡船梁頭滿八尺稅錢六十文

七十錢 蒼茫城七十流落劔三千月分梁苑未來
給水衡錢 杜子美詩

八十錢 孟康註國語母子錢云錢重爲母輕爲子
若市八十錢物以一母當五十以子三十足之

九十錢 計然曰夫糴錢九十則病未病末則財不
出 越絕書

百錢 手拄一條青竹杖真成自挂百錢遊夕陽西

下山更好。深林無人不可留。黃華老人王廷鈞書傳不知誰作

二百錢 唐永徽以後海內富庶絹疋二百錢一書生方

許

三百錢 速宜相就飲一斗恰有三百青銅錢杜詩

四百錢 天有所短錢有所長四時行焉百物生焉

魯頌錢神論

五百錢 五百青蚨兩家缺赤洪崖打白洪崖丁謂詩

六百錢 劉寵召入有五六父老人賫百錢送之

七百錢 唐制 職三班月俸七百錢羊肉半斤

八百錢 齊俗尚烏紗巾家家踊貴其一家特榜其門曰本家每頂只賣八百文 小說文子

九百錢 和凝問馮道靴價道徐舉左足曰九百凝怪已靴直倍之方罵其委買者道徐舉右足曰此亦九百

千錢 一日一錢千日一千繩鋸木斷水滴石穿 張

判盜錢者詞

二千錢 漢法卒更無常人迭爲之貧者欲得顧更富而當更者因出錢顧之月二千

三千錢

孟嘗客三千邑入不足使人出錢於薛

本傳

四千錢

東坡與少游書每月朔取錢四千五百畫

爲三十塊挂屋梁上每旦用畫叉挑一塊用之余者以備他用○註似月所用錢不過四千也

五千錢

惡少王力奴以錢五千召黥工於胸腹刺

涅山亭池榭柳木花鳥無所不備

酉陽雜俎

六千錢

官作既有程者鹽烟在用自公斗三百轉

致斛六千

七千錢

唐開元後米斗錢七千

食貨志

八千錢

計然曰大糴錢上不過八千則農末俱利

絕

書

九千錢

杜祈公曰我致政後必買小駟直八九千

錢者着鹿麻衫跨而入市看盤鈴傀儡

萬錢

何曾日食萬錢猶云無下飭處

二萬錢

劉延之送淵明二萬錢悉付酒家稍就取

飲 本傳

三萬錢

孫之翰人餽石硯云直三十千呵之得水

孫曰日費水一担止直三錢還之

四萬錢

蔡君謨造貢茶每片直四萬錢

五萬錢

褚遂良問虞監曰吾書何如永師虞曰聞

永一字直五萬錢公豈得此

改陶谷夢
少時換服

六萬錢

汝陽三斗始朝天張旭三杯神聖傳左相

日與費萬錢

七萬錢

北魏宗室元誕鎮齊所遣采藥僧還問外

間有何語曰但言王貪誕曰齊州七萬戶我到來一

家未得三十錢何貪也

八萬錢

唐高祖入長安民間行錢環錢積八九萬

猶不滿斗斛

食貨志

九萬錢 蔣潛路遇爛屍每鳥集啄則尸頭先一小
兒驅之蔣迫視之則所簪者通天犀也後入王武岡
家得錢九萬

十萬錢 張延賞爲度支欲辨出一冤獄誣者悉再
三帖潛上錢十萬文張曰錢過十萬可以通神竟停
辨○又昌黎舍錢十萬修黃陵廟且作碑文

二十萬錢 顏公二十萬盡付酒家錢興發每取之
聊向酒中仙

三十萬錢 董宣知維陽至格殺主家僮光武召宣
令拜謝宣不從令人按項亦不倒賜錢三十萬呼爲
強項令

四十萬錢 郭元振爲太學生家送錢四十萬有言
五世未葬者貸之不問名姓○崔郊有婢賣與某得
錢四十萬云云

五十萬錢 曹彬下江南還上客使相之賞乃賜錢
五十萬彬曰好官不過多得錢耳

六十萬錢 大蘓與楊元素書聞任郎中子欲賣荆

湖莊子

直六十萬先只要若干

蘇全集

七十萬錢

唐宰相王涯女乞錢七十萬買一玉釵

涯拒之曰一釵七十萬此妖物也

八十萬錢

臣聞熙寧中蘇杭等州旱歛者凡八十

萬邇者年饑更倍熙寧乞賜上供錢應副

八萬奏議

九十萬錢

王仲舒觀察江西西道奏罷推酤錢九

十萬

昌黎選墓誌註
本云九千萬非

百萬錢

劉毅家無儲蓄之儲樗蒲一擲百萬

千萬錢

崔烈入錢五百萬得備九卿及拜漢靈臨

軒謂左右曰悔不少斬可至千萬○宋季雅與呂僧珍爲鄰曰千萬買鄰

萬萬錢 愚今考經國之制爲居家之法隨資產之

多寡制用度之豐儉合用萬錢者用萬錢不謂之侈

合用百錢者用百錢不謂之吝是取中可久之制也

校山家制張鷟之文如青銅錢萬選萬中號青錢學士

徐文長逸稿卷二十四